



**Cussegliera nazionala Brigitta Gadiant vul scumandar imports da delfins.**

# Brigitta Gadiant s'engascha per delfins

## Moziun en il cussegl naziunal

DA CLAUDIA CADRUVI / ANR

■ **Ella lascha anc ina giada ora cups en l'ultima sessiun. Cussegliera nazionala Brigitta Gadiant vul scumandar imports da delfins.** Ella ha rimnà 50 sutscriziuns per sia moziun. Ina quarta dals cussegliers nazionals sustegn pia l'intervenziun che Gadiant ha inoltrà quest'emna. «Il cussegl federal vegn incumbensà da relaschar in scumond immediat per imports da cetacea», stat scrit en la moziun. Cun cetacea è manegià balenas u delfins.

En Svizra datti anc in delfinariun en il Connyland. Là sajan morts sis animals ils ultims trais onns, scriva Gadiant.

### Animals sut stress

Delfins hajan il basegn da nudar lunsch enturn. Els dovrian ina buna qualitat d'aua. En cumparegliaziun cun l'ambient natiral sajan ils aquaris bler memia pitschens, explitgescha Gadiant en la moziun. Ils delfins possedian in sistem sonar excellent e sajan sensibil sin canera. En in delfinariun sajan els trasor exposts a ramurs che chaschunian stress permanent.

Examinaziuns scientificas mussian ch'ils animals na survivan betg uschè ditg en ils aquariums. Perquai vegnian adina importads animals, tge che na correspundia betg a las stentas da proteger la spezia.

### Scumond da shows

Dudesch pajais da l'Europa na mussian naginas shows da delfins pli, argumentescha Gadiant. En l'Engalterra hajan ins serrà trenta delfinariums suenter che var 300 animals sajan morts. A Luxemburg, en Slovenia e Zypra hajan ins insumma scumandà da tegnair delfins.

En Svizra hajan existì dus delfinariums. Quel da Rapperswil haja serrà en il fratemp. Connyland tegnia anc adina animals, malgrà che plirs delfins sajan crappads.

Gia avant 15 onns haja il cussegl naziunal dà suatientscha al giavisch da scumandar imports. Il cussegl dals chantuns haja refusà la moziun. Uss confermian novs studis ch'ins na possia betg tegnair cetacea a moda adequata. L'ordinaziun per la protecziun d'animals enumereschia las balenas ed ils delfins sco animals selvadis cun basegns speziels pertutgant

la tgira. «Vul ins realisar questas disposiziuns en tutta consequenza dovra quai cler e net in scumond d'import», stat scrit en la moziun da quest'emna.

La Svizra enconuschia gia il scumond d'import per fols-giat e fols da chauns per motivs da la protecziun d'animals. «Tant pli duess in tal scumond era valair per cetacea, quests animals da mar ordvart sensibil.»

### «Il tschertgel sa serra»

Gia l'emprim onn en il cussegl naziunal saja ella s'occupada da questa tematica, di Gadiant a l'anr. Ella aveva proponì en la cumissiun da formular quella moziun ch'era suenter vegnida acceptada dal cussegl naziunal, ma betg dal cussegl dals chantuns. Uss, en ses ultim onn sco cussegliera nazionala, sa serria il tschertgel. Questa stad hajan pliras persunas fatg attent ella sin la tematica ed ella haja anc ina giada formulà ina moziun per in scumond d'import.

Cunquai che tants collegas han sutscrit l'intervenziun e plirs stadis han en il fratemp scumandà imports è Gadiant optimista che la Svizra suonda uss era.